

大乘阿毗達磨雜集論述記卷第二十五

唐京兆大慈恩寺沙門窺基撰

差別云何。

答有二。初十八任持依度辨差別。後七種施依位辨差別。初文有三。初明十八任持。次以六度各三差別釋。前任持。當知財施下逐難釋。

謂由十八種任持。以顯六波羅蜜多差別。何等十八。謂身任持。心任持。善法任持。善任持。菩提任持。悲任持。不捨有情任持。捨下劣心任持。無生法忍任持。善根方便任持。善根圓證任持。善根無盡任持。無厭倦

任持諸所思事成滿任持御眾業任持證入大地任持引發佛性任持建立佛事任持。

初文有三。一標。二徵。三顯。

十八任持卽經中初有勢句加行精進謂善根圓證任持。由此加行能證菩提圓證之時靡不由此卽無怯弱行精進時心有彼苦無退屈故。他惱不動名無退轉。無懈勤修名無喜足。卽經中云有勇堅猛不捨善軌。此中意如緣世俗慧名證入大地任持。由此爲加行故。其更有文前後不同。勘攝論第七知之。十八任持佛具幾也。施云並具足戒中

別解脫通無漏佛身卽有別別防非遠分對治故。若唯有漏佛無別別防非卽不具也。據義具時具餘二戒佛無怨害及苦安受。約義用有設有無妨諦忍亦具精進及定義用而論亦得具足隨相起位。如攝論者唯有第三精進而無前二。慧中緣世俗慧以加行智故佛身無有若無漏加行八地以上亦有佛約義用與後得無異。縱有無妨據無時好。此十八任持通論可爾。唯有漏地前者云何具幾任持耶。釋曰。若隨境作相亦得具十八。若以體者有具不具。且如忍中諦察法忍緣諦生智。第九

卷解諦察法忍若在地前名苦法智若入地上方名爲忍地前卽如前第八卷釋加行道煖頂等乃至名順諦忍亦約義用似地前非於諦生忍已生忍與地上何異故知定無有。又如慧中緣勝義者此唯無分別智若地前緣理是法卽義說剋體卽非。又與緣世俗慧何異以論文云由此證入初地故。故知地前體亦無有若約十六或可漏無漏此。前二種於理未明若約義用具十八若約起位。依論文更有不具者。細讀尋之。

施等六種各三差別如其次第三三所攝施三種者

謂財施無畏施法施戒三種者謂律儀戒攝善法戒饒益有情戒忍三種者謂耐怨害忍安受苦忍諦察法忍精進三種者謂被甲精進加行精進饒益有情精進靜慮三種者謂現法樂住靜慮引發神通靜慮饒益有情靜慮慧三種者謂緣世俗慧緣勝義慧緣有情慧當知財施能任持身由飲食等諸資生具攝益受者所依身故無畏施能任持心安慰他心離憂怖故如是餘句隨義應思下劣心者謂諸菩薩厭生死苦同二乘心由安受苦忍所任持故方捨此心善根無盡者謂窮生死際恆作一切有情利益安樂事

乃至於無餘涅槃界亦不棄捨。由饒益有情精進所任持故。御眾業者謂依止內證故。教授教誡所化有情心未定者令其得定。心已定者令其解脫。由饒益有情靜慮所任持故。證入大地者謂先信解甚深教法資糧圓滿。速能證入初極喜地。由緣世俗慧所任持故。所餘易了。故不重釋。

六波羅蜜各三種中大論七十八戒中一轉捨不善戒。卽此中律儀戒七支無作戒。二轉生善戒。卽此中攝善法戒。若約此卽前律儀望善而論。名攝善法戒。三者轉生饒益有情戒。此中文意亦卽前

戒轉義能生。如攝論解律儀戒中云。卽此能攝建立後二尸羅。由此防護能修供佛等。今第二戒及能饒益有情卽第三戒。以此而論也。初生後二。未必卽以前律儀爲體。又精進中一云。一種與無益第二。一種卽言轉生。若約此體。一種位分成多前戒。應然言轉生故。猶如精進。旣由前釋轉生後者。何故轉上不言轉生。以此而論。未必卽前體也。以此中依生故言轉生。非同體也。思聞如彼攝論。亦是次第轉生。定中大論云。無分別智寂靜極寂靜。無罪對治煩惱。眾苦樂住靜慮。此論直言現法樂。

住。若約此論。由漏無漏者得。大論唯言無漏。初地以去。約勝者論。以有無分別等言。故第三亦言引發。此論無心定能引生益有情故。或次第相生名引。有無如前會更思。

逐難釋中有二。初十八差別中開二配任持。後釋四任持。於中各有二。初說後例。

又差別者。謂施有七種。一根本施。謂種姓位菩薩所有施波羅蜜多。依止種姓而行施故。二弘誓施。謂發心位菩薩所有施波羅蜜多。依受大願而行施故。三攝受施。謂自他利行位菩薩所有施波羅蜜多。四無

執受施。謂觀真實義位菩薩所有施波羅蜜多。以無施者等分別執受故。五無攝受施。謂威德位菩薩所有施波羅蜜多。雖不攝受外資生具。但由虛空藏等三摩地力。舉手摩空。隨欲皆雨珍寶等物。六隨所應施。謂成熟位菩薩所有施波羅蜜多。隨所化宜而行施。故七廣大施。謂最勝菩提位所有施波羅蜜多。以無上故。如施有七種。乃至慧亦爾。隨其所應。

後七差別中有二。初標後釋。七位中初三在地前。卽菩薩地種姓發心。自他利三品。次三二釋。一云。無執受從初地至七地。無攝受在第八第九地中。

隨所應在第十地。二云無執受在初二地。無攝受在三地。至七地隨所應在八九十地。

七種差別。一種姓者。大智度論舍利弗六十劫行菩薩道。依瓔珞經若一劫二劫乃至十劫。修信等十行。得入十住。劫有大小時節無異。優婆塞經舍利弗八萬劫行菩薩道。所以退者未得解脫分法。雖爾猶勝聲聞緣覺利根者。未至十住第七正心住故。此中應勘自他利行在何位。勘菩薩地。今且依七地解種姓則種姓地。發心施即勝解行地。攝受施是淨勝意樂地。初攝受自他故。無執受施即

二三四五六七地。彼行正行地。一切地雖已無執受。此位雖二利。初地創二利勝。此六地不執受。三輪淨勝。名觀真實義證實攝故。無攝受施謂八九二地。即決定行地。并先之七地。雖能變現資財等施。然未自在。猶修攝受積畜以施。此位不爾。故名無攝受。隨應施謂第十地。即究竟地。一分一分是此第七如來故。真隨機宜而施。雲雨說法等故。論云威德者。唯取八九兩地。不取第十。以成就位是第十地故。

攝云何謂爲攝菩薩地故。於中略說施等波羅蜜多。

第七攝門中初標後釋。

此攝略有四種。

釋中有二。初舉數後別顯。

一種姓攝。謂施波羅蜜多等種。姓相應隨順知。二發心攝。謂差別發心所攝。故發心有二種。謂無差別差別。無差別者。謂願我當證阿耨多羅三藐三菩提。差別者。謂願我施波羅蜜多。速得圓滿。乃至慧波羅蜜多。速得圓滿。當知此中。由差別發心攝。諸波羅蜜多。此是彼因。故三自他利攝。謂由施故。攝受一切富樂自在。是名自利攝。由此施故。引攝財物爲饒益。他是

名他利攝。如是所餘攝相。隨義應知。四勝義攝。此復多種。謂或依法界說。以真如是施等共相。故或依智資糧說。以能成辦一切智。器故。或依智攝受說。以能成滿一切智。故。或依智隨轉說。以五波羅蜜多。隨慧波羅蜜多轉。故。或依智相說。以慧波羅蜜多是正智自體。故。如是勝義。以真如及正智爲體。故能攝施等。由此略說所餘攝義。如理應思。

第四勝義攝有二。初以如智攝。後例餘攝。初中有三。初標次顯。後結。例餘者。謂初行攝。以布施攝之。如般若論說。施度攝六等。或福攝智攝等一切皆

知智攝四中初三智攝餘五後一自體攝不攝餘自體故。

七十八三學相攝初三是戒學定一是定學慧是慧學精進通三學與此不同如第十卷八道支中會釋福德智慧攝者戒學是福德慧是智慧精進靜慮通福德智慧或有處前五是福後一是智或有前三爲福後三爲智或有處初三及定是福慧一是智精進通二也或有處初三及定爲福精進及慧爲智或有以定伏惑隨慧說智或剋自體說福或有約利他名福隨順前三以自利說智說後

一。或有以精進徧三學通福智。或有前以通相論徧策表精進亦福。或有據實徧策三學通福智。或有以策慧增義說智。隨相應知如攝論鈔會。

所治者謂施等六。如其次第以慳悋犯戒忿恚懈怠散亂惡慧爲所治。復次乃至一切波羅蜜多所攝善法。彼所對治及所知障皆是波羅蜜多所治功德者。謂依五果無量無邊稱讚勝利皆名功德。謂能永斷自所對治是諸波羅蜜多離繫果。於現法中由此施等攝受自他是士夫用果。於當來世後後增勝展轉生起。是等流果。大菩薩是增上果。感大財富往生善

趣無怨無壞多諸喜樂有情中尊身無損害廣大宗族隨其次第是施等波羅蜜多異熟果。

異熟果中大財。一善趣。二無怨。三無壞。四所作善門無破壞故多諸喜樂。五靜慮果有情中尊加行智果無損害無分別智果不爲自他分別故。大果後得智果攝他有情故。依攝論大果是忍果。今正解云。有情尊是慧果。內身無損害廣大果有外六處。勤瑜伽第三。

功德五果中解異熟果。如大論七十八解深密經亦有六種與此文同。論云。一者得大財富如攝論

第七卷富貴攝者是施勝利。二者往生善趣。攝論云。大生攝者是戒勝利。三者無怨無壞多諸喜樂。攝論云。大朋大屬所攝是忍勝利。謂行忍者一切歸輔故。無怨害故。此文意說具般若者一切眾生咸歸屬故。所望別也。四者爲眾生主。此中言有情中尊。攝論云。廣大事業加行成就所攝者是精進。勝利廣大。一事業謂輪王等。於中策勵名爲加行。所作皆辨。故名成就。五者身無損害。攝論云。無諸惱害性薄塵垢所攝者是定勝利。由定故。感法威力。卽此定起。故諸惑伏不生。故塵垢性薄。六有大

宗葉卽此中廣大宗族攝論云善知一切工論明處所攝者是慧勝利彼依自利此依利他勘攝論此文非異熟果是增上果以善知工論明處非無記故大論釋異熟果故言廣大宗葉攝論汎解勝利亦無相違又善知工論等是慧增上勝利由此故爲餘小智學者所輔故有廣大宗葉亦是異熟果以此細勘得定無惱害等未必是異熟果通上總別報異熟細諳委問。

更互決擇者略有三種一方便二差別三差別顯示第十決擇門有二初標後辨。

方便者謂施方便中一切可得如捨內外一切身財是施方便此方便中若捨一切是施波羅蜜多。

方便中初施後餘度初中初總後別。

卽於此中若慈悲心遮防一切損害逼迫惱亂他性是戒波羅蜜多卽於此中忍受遮礙損害疲倦是忍波羅蜜多卽於此中數數發起勇勵施心是精進波羅蜜多卽於此中其心純善繫心一境不外流散是靜慮波羅蜜多卽於此中善取施行如實因果不取異見是慧波羅蜜多如是乃至慧波羅蜜多方便中隨其所應當善建立由無畏施一切處有施故。

方便中由無畏施一切處有者。且據一施通在六中。其實法施亦等。

差別者略有四種。一自體差別。二助伴差別。三勸讚差別。四種植差別。施等波羅蜜多自體差別者。如其次第。以棄捨防護堪耐策勤心住決擇爲體。

差別中有二。初標四門差別。後別解施體通局屬種殖。

問六波羅蜜體性者。財以四塵五塵爲體。施以無貪性無畏施。依下文以五波羅蜜爲性。戒中饒益有情戒忍中耐怨害忍精進中饒益有情精進定

中饒益有情定慧中緣有情慧俱利有情義說。或義乃至隨慧相應知名慧。如下會釋法施下文以六波羅蜜爲性。

或施皆以無貪性。如十一卷以三業爲體。或以慧爲性。或以欲數爲體。

法師云。攝善法戒準下文以菩提心聞思修慧及三業爲性。十波羅蜜同此。饒益有情戒同前二戒爲體。以用此戒安立有情於善趣及三乘故。準下文別出體者。以四攝四無量等純利他行爲體。餘體廣如別章。種姓習性廣如別處釋。

助伴差別者。謂施等方便中餘波羅蜜多悉皆隨轉。如前廣說。

何因餘但有四波羅蜜以爲前六助伴故。前三以方便爲助伴。前三攝有三。以方便爲助伴。故願爲精進伴。以不能引發定慧神通。無閒修習彼。又下界修習者。於未來世彼便發願。乃至煩惱微薄。願爲精進伴。得上界勝解。轉劣意樂成勝解。轉於內心住有所堪能力。爲靜慮伴。聞思生修。修能發智。由此智故。發生出世慧。智爲慧伴。卽有漏修慧生。無漏智。又若佛身等者。以正智生後得。故一一波

羅蜜皆有七清淨。廣如彼論。乃有多復次釋異門等。尋之。無種姓。廣如別章。不可繁引。

勸讚差別者。謂於施等勸勵讚美。隨喜慶悅。

差別言勸勵義。是口業。隨喜是身業。慶悅是意業。或但總言勸他令學。而隨喜慶悅。有文釋。此忘不知處。可覓。

種植差別者。謂於他相續中。建立施等波羅蜜多。此中施波羅蜜多是財施。餘五波羅蜜多是無畏施。一切六。是法施。皆於他相續中種植故。

般若論云。檀度攝於六。資生無畏法。此中一二三。

是名修行住。無性云。施性中現有六波羅蜜多。財施無畏。法施所攝。故論云。施是財施。無畏謂餘五。財非五體。故言施是財施。用餘五以爲無畏體。故言無畏。謂餘五。以別財施。故不言六。卽無畏財施皆名法施。故言法施通六。其用任持十八中。或總取。或別取。如上會者。此文勢旣不簡餘五。三種並無畏。餘六總皆是法。常所不簡。卽溷相師不然。差別應知。如前已會。看一行門。但或皆施。故似總取。菩薩地第五決擇七十八廣說。或無畏通六者。於施中一分餘五皆無畏法施。但六皆法施。或義

隨六中有無畏義法施。義相應者卽此體。不相應者。隨自波羅蜜之體。

差別顯示者。謂由一行等差別。顯示施等波羅蜜多。差別顯示中。初標後釋。

如有問言。若施波羅蜜多。亦戒波羅蜜多耶。設戒波羅蜜多。亦施波羅蜜多耶。爲答此問。應作順後句。謂所有戒波羅蜜多。皆是施波羅蜜多。或有施波羅蜜多。非戒波羅蜜多。謂戒波羅蜜多。所不攝。施波羅蜜多。如是。乃至以慧波羅蜜多。對施波羅蜜多。皆應作順後句。餘互相望。亦如理應思。此中依始業地漸次。

修者說後必待前。前不待後。是故皆作順後句。若已串習六種頓修。皆互相攝。如菩薩地說攝善法戒者。謂六波羅蜜多。

釋中有二。初以諸度相對爲二四句。初後修別故。順後句門中攝善法戒通六種。卽戒中攝善法戒。攝能令得力無畏等一切佛法名戒。卽忍中諦察法忍精進中。加行或別取被甲定中。引發神通慧中緣世俗慧或緣勝義慧。

若依純雜相資助說。應作四句。

後以純雜爲二四句。初標後解。

純雜中唯自行不望他爲純。對他爲雜。論文自有。若唯依施名純。若對戒名雜。施得三句。餘五四句。以後待前。前不待後。故有三句四句等。

復次諸所有施皆波羅蜜多耶。設波羅蜜多皆是施耶。爲答此問。應作三句。或有是施非波羅蜜多。謂所行施不迴向大菩提。或有亦施亦波羅蜜多。謂所行施等迴向大菩提。或有非施非波羅蜜多。謂除上所說法。如是乃至依慧波羅蜜多。一一皆應作四句。如理當思。復次一切行施皆能生施波羅蜜多。種類福耶。此應作四句。初句謂所行施不迴向大菩提。第二

句謂於施波羅蜜多勸勵讚美隨喜慶悅第三句謂所行施迴向大菩提第四句謂除上爾所相如是乃至依慧波羅蜜多各作四句如理應思。

解中初施後例。

復次何緣說方廣分爲廣大甚深耶。由一切種智性廣大甚深故。謂此所得一切種智性果最廣大甚深故。因受果名是故別說方廣分爲廣大甚深。復次何緣一分有情於方廣分廣大甚深不生勝解反懷怖畏耶。由遠離法性故。未種善根故。惡友所攝故。法性者謂菩薩種姓是彼自體故。由一分有情無菩薩種

姓故。心性下劣於廣大甚深教不能勝解是故怖畏。又一分有情雖有菩薩種姓而於大菩提未種正願等諸善根故。於此不能勝解是故怖畏。又一分有情雖已種善根而爲誹謗大乘有情惡友所攝故。於此不能勝解是故怖畏。

第二大段方廣違乖中有二。初不解生怖。後生解不出。

復次何緣一分有情於方廣分廣大甚深雖生勝解而不得出離耶。

後中初問後答。

由深安住自見取故常堅執著如言義故深安住自見取者更不進求了義經故常堅執著如言義者恆堅封執不了義經故如聞一切法畢竟無自性言故便撥一切諸法性相皆無所有如是於餘不了義經堅執如言義亦爾是故雖信大乘而不得出離以大乘經由種種意說故。

答中初理答後引證理答中有三初標二義次別釋二後結成。

依此密意薄伽梵於大法鏡經中說如是言若諸菩薩隨言取義不如正理思擇法故便生二十八不正

見。

引證中初總後別顯。

何等名爲二十八不正見耶謂相見損減施設見損減分別見損減真實見攝受見轉變見無罪見出離見輕毀見憤發見顛倒見出生見不立宗見矯亂見敬事見堅固愚癡見根本見於見無見見捨方便見不出離見障增益見生非福見無功果見受辱見誹謗見不可與言見廣大見增上慢見相見者謂聞大乘經中所說一切諸法皆無自性無生無滅本來寂靜自性涅槃等言不善密意但隨此言義便生勝解。

謂佛所說一切諸法定無自性定無生等執著如是無性等相是名相見彼執著如是無性等相時便謗三自性謂徧計所執自性依他起自性圓成實自性徧計所執自性者謂諸愚夫於色等相周徧計度起增益執謂此是色乃至此是涅槃此所執義無實無體唯有名言之所施設依他起自性者謂卽此色等唯是虛妄分別自體又因果性或異不異圓成實自性者謂一切法眞如實性於此三性起誹謗行卽次三見謂損減施設見損減分別見損減眞實見彼如是誹謗一切種一切法時爲欲成立此邪見故便復

攝受少分道理又於所有開示離言諸法實性了義契經廣設方便皆悉轉變令順已見如是二種卽次二見謂攝受見轉變見彼又起如是見若依此見行善不善定皆無罪無有過失一切所行皆歸妙善先所積習一切障垢皆得出離如是二種卽次二見謂無罪見出離見彼如是執自見已便於此見相違安立蘊等諸法聲聞藏中妄生輕毀又於不信如是邪見聲聞人等深生憎嫉如是二種卽次二見謂輕毀見憤發見彼又隨順自惡邪見謂我當建立如寶空無相無願於非彼相起彼相想而於彼相顛倒建立

又作是思惟若能悟入如是法性或令他人一切皆  
生無量功德如是二種卽次二見謂顛倒見出生見  
若他於彼所起惡見如理詰責彼於爾時竟不樂欲  
建立自宗反以機弄妄理詰責於他如是二種卽次  
二見謂不立宗見矯亂見彼又起如是增上慢謂若  
能如是修行是真供養恭敬諸佛世尊如是見者名  
敬事見諸有善達無倒法性者爲令捨離彼惡見故  
雖以種種真實成立道理方便開悟堅守愚見曾無  
捨心謂唯此真餘並邪妄如是見者名堅固愚癡見  
如上所說諸見所有習氣麤重是名根本見爲欲開

示如上所說十七種見諸過失門復說餘見謂卽相  
見名於見無見見此實堅執無性等相而起不執一  
切相想故卽損減施設見損減分別見損減真實見  
名捨方便見由彼誹謗一切法性於勤精進起無用  
想故卽攝受見轉變見名不出離見非方便修學不  
能證果故卽無罪見出離見名障增益見所行邪僻  
無容盡障故卽輕毀見憤發見名生非福見由於正  
法同梵行所起邪行門便能引發大衰損故卽顛倒  
見出生見名無功果見由所安立非正法性授者受  
者俱不能證勝進果故卽不立宗見矯亂見名受辱

見非理興論無宜得勝故。卽敬事見名誹謗見所不應說強增益故。卽堅固愚癡見名不可與言見邪執空者不應與言徒設多辭終無所益故。卽根本見名廣大見由此當來諸惡見類轉增廣故。卽上所說二十七見皆名增上慢見。並能發起虛妄無實增上慢故。此云何知。由彼經中卽次後說。如是諸見十七卽十。卽十七。二十七卽一。一卽二十七故。

別顯中初徵二十八見。次別解後釋由。

二十八空見中定異不異者。二釋。一謂以因有爲望擇滅涅槃爲異。廣如前論。二異熟因果性各異。

故名異。增上因果同性者。名不異。此解爲勝。此解依他性故不解無爲。又有因果法異不異。又諸法同類名不異。異類名異。誹無徧計所執名損減者。此損減其名。卽施設者。是名亦號聲。如攝論多說聲。或說爲施設。卽此者是廣如大論決擇說。若於其執卽是損法增益。論人法塵體體卽是無。唯有其名。誹無名故。卽名損減。諸論不同。皆如此會。攝論同此。此二十八爲一人起爲多人起。方成二十八耶。一人具足亦無妨。多人起亦得。又六十二見二十八云何相攝。至六十二見處當廣釋。又此唯

內凡愚癡者起非唯外道別當與六十二見及諸見等相攝。

第三大段密意中有二。初解無自性。後解無生無滅等經。

復次如方廣分說一切諸法皆無自性。此言依何密意說。

初中初問後答。

謂無自然性故。無自體性故。無住自體故。無如愚夫所取相性故。無自然性者。由無自然性故。說無自性。不遮待緣性故。說無自性。無自體性者。由此自體會

所經有。即此自體不可復有。故說為無性。無住自體者。體雖現在。未至壞相。次必當滅。體無住義。故說無性。無如愚夫所取相性者。如諸愚夫未見諦者。依止名言戲論熏習門。妄取諸法性相。遠離如是所取自性。故說無性。

答中有三。初唯依依他解。次依三性解。後總結成初中復二。初標四門。後釋其義。

論問說一切法無自性。中無自然性者。若準解三無性。即依他起上有自然生性。依他不遮待緣生性。唯遮自然生性。又唯次二破過去現在。此初即

破未來有謂未來性定有來世諸法非性定有未緣生故無自然有性若緣生時方有不遮待緣性云何言未來法有自體性此未來體性若自然有卽同外道非謂緣生若已緣生云何言未來廣破未來如引顯揚更說。

復次於徧計所執自性相無性故於依他起自性生無性故於圓成實自性勝義無性故更依異門顯無性義故言復次一切法者卽三自性謂徧計所執自性依他起自性圓成實自性徧計所執自性定無自相自相無故名相無性相無性故名爲無性依他起

自性待眾緣故非自然生無自然生性故名生無性生無性故名爲無性圓成實自性清淨所緣故於依他起中無徧計所執相所顯自體故勝義爲自體故無性所顯故名勝義無性勝義無性故名爲無性。

依三性中初標後釋。

論云於徧計所執自性相無性等者如顯揚第十六成無性品中先明三自性次明三無性當知無性不離自性三自性體者如古師或有多種出體情事理門染通淨門塵識理門等如此皆虛妄計度不如理故依西方唯有二重一常無常門二漏

無漏門。若以常者爲圓成實。無常者爲依他起者。如顯揚無性品云。依他起者。所謂諸法依諸因緣所生自體。此文卽證無常者爲依他起。圓成實者。所謂諸法眞如自體。此文卽證常者爲圓成實。是則佛果一切功德皆依他性。若有漏者是依他起。如攝大乘論第五卷頌云。若說四清淨者。是則圓成實。四清淨者。一自性清淨。謂眞如。二離垢清淨。謂卽此離一切障垢。三得此道清淨。謂一切菩提分法。波羅蜜多。四生此境清淨。謂諸大乘妙正法教。是則佛果一切功德皆圓成實。當知此文卽證

有漏者是依他起。無漏者是圓成實。其唯有擇滅。非擇滅。虛空不動想。受滅。難知大義。此等並無體。唯心所變。且如擇滅不動想受等三。唯惑斷不生。卽顯如理。如理之上。假建立不生名。擇滅等若論本性。以眞如爲體。二重出體。皆圓成實。若約從心變作不生法。隨二重體。卽兩處收。虛空非擇滅。廣如第二卷解。無爲中釋。此二無體。唯於頑空之處。假立虛空。諸法闕緣。假立非擇滅。若約本體。是無。唯有從心所變。是依他起性。若以常無常門。是依他起性。若以漏無漏門。此雖無記。亦不爲漏所漏。

是無漏卽圓成實收。若以一切諸法皆以眞如爲體卽圓成收。又空有二。一理空卽圓成實。二事空卽此所明者是。次明三無性者。如無性品頌云。三無性應知不離三自性。由相無生無及勝義無性。不離前三性也。卽徧計所執唯有名無體相名相無性。非是除徧計所執別有相無性。卽依他起上有因緣生。據自然生執名生無性。亦非除依他外別有生無性。勝義卽體是無性。又諸法無性爲自性。故言勝義無性。卽徧計所執也。此三無性出體如三自性。徧計依他無所取二性之相生。故名無

性。圓成自體卽無或無徧計諸法。有此徧計無性名勝義無性。此等但無所執名無。或有設於徧計名亦生執及依他上生實緣生執等。此皆是無。但對外執除非故。且說相生等無性。執蛇起繩如第一卷鈔解。若廣分別。如決擇分第七十三顯揚第十六攝論第四五廣明。讀者尋之。其與五相攝廣如別章。如第二卷解五法義中解。

由此道理是故如來說一切法皆無自性。非一切種性相俱無說爲無性。又彼說言一切諸法無生無滅本來寂靜自性涅槃。此依何密意說。如無自性無生

亦爾。如無生無滅亦爾。如無生無滅本來寂靜亦爾。如本來寂靜自性涅槃亦爾。

解無生無滅等初問後答答五轉。

論云一切法無生滅等中如無性攝論第五云如始從常乃至自性涅槃無二且如常無常等者是依他起法性真如體是常住。徧計所執自性分邊體是無常此常無故此性常無名無常非有生滅說名無常此意說依他起上非真如如常非實有生滅如徧計所執法據實非常非無常二分所依說爲非常亦非無常又解苦樂無二圓成是樂

徧計所執分是苦無二者是依他起分如是卽釋此文無生等類解彼論類之。

第四大段解決了有二初解意趣後解秘密。

復有四種意趣由此意趣故方廣分中一切如來所有意趣應隨決了。

初中初標後解。

何等爲四謂平等意趣別時意趣別義意趣眾生意樂意趣。

解中初徵列後別釋。

平等意趣者如說我於爾時曾名勝觀如來應正等

覺與彼法身無差別故。別時意趣者。如說若有願生極樂世界。皆得往生。若暫得聞無垢月光如來名者。卽於阿耨多羅三藐三菩提決不退轉。如是等言。意在別時故。別義意趣者。如說一切諸法皆無自性。如是等言。不可如文便取義故。眾生意樂意趣者。謂於一善根。或時稱讚爲令歡喜。勇猛修故。或時毀訾爲遮得少善生喜足故。爲貪行者稱讚。佛土富樂莊嚴。爲慢行者稱讚。諸佛或有增勝。爲恆悔惱障修善者。說如是言於佛菩薩。雖行輕毀。然彼有情亦生天趣。爲不定種姓者。捨離聲聞。下劣意樂。故記大聲聞當

得作佛。又說一乘更無第二。

四意趣第一除佛障。第二除懈怠障。第三除輕聖法障。多百千佛所修行方聞。此經等是。第四除五障。如文可知。攝論不及此。然聞多寶佛與此自出別。

四意趣攝論第五云。遠觀於他。欲作攝受。名爲意趣。卽爲教初發心。名爲意趣。近觀於他。欲令悟入。說名祕密。卽發心已。爲令入道。名爲祕密。以此之義。故有差別。初意趣卽治輕佛障。外謂佛始有非久已聖。我師久已成道。故說會爲彼佛等。如彼論

釋卽彼佛言如云有意緣互相似性。第二意趣謂治懈怠障故令念佛等。謂由唯發願得生極樂國土者此別時意不障行願相扶。若行願相扶至初地故如但由一錢而得於千。三別義意趣爲治輕法障。此論文唯說無自性等。如攝論云若已逢事爾所歿伽河沙等佛於大乘法方能解義以證相大乘與教相大乘甚有差別。謂眾生輕法大乘法亦爾未爲甚深。故言之云若逢事多佛方能解義。隨言義內證義甚有差別。第四意趣爲除小善生足貪慢行惡作不定性等。說攝論唯有除小善生

足障而無餘者。據一隅故稱讚佛土等。以貪世間富樂故。故讚淨土多諸富樂。恃己強力與叡財等。故稱讚佛。以會造罪恐不生天。故除惡作障。引不定種姓聲聞。廣如別鈔章記及顯揚第十六等。廣說四種聲聞等。

復次有四種祕密。由此祕密故於方廣分中一切如來所有祕密應隨決了。

祕密中亦二。初標後解。

何等爲四。謂令人祕密相祕密對治祕密轉變祕密。如是四種於大乘中略攝如來一切所說祕密道理。

解中初徵列後別釋。

令入祕密者謂於聲聞乘說色等諸法皆有自性爲  
令無怖畏漸入聖教故。相祕密者謂於三自性說一  
切法皆無自性無生無滅等。對治祕密者謂爲調伏  
諸過失者如來宣說種種密教。如爲對治八種障故  
說最上乘。何等爲八。謂輕佛法懈怠少善生喜足貪  
慢行惡作不定性差別。廣說指事隨其所應如四意  
趣說。轉變祕密者謂經所說隱密名言。如說覺不堅  
爲堅。善住於顛倒極煩惱所惱得最上菩提。此中密  
意者謂於不散動起堅固勝覺。所以者何。堅有二義。

一貞實。二散動。由此散動令心剛逸。故亦名堅。善住  
於顛倒者。謂翻常樂我淨四倒爲無常等。故名顛倒。  
於此不退故名善住。極煩惱所惱者。謂於長時精勤  
苦行。極爲勞倦所逼惱。故得最上菩提者。若具如上  
所說三事。定速當證無上菩提。

四祕密等。分差別。餘義大同。善住顛倒。彼知四倒  
是倒。此翻倒爲倒。各據一義。亦不相乖。

四祕密名如前釋。初爲怖斷障。說心常者。於諸無  
性障故說。卽於聲聞乘說色等有是。二爲除愚癡  
執障。說三無自性等。三爲除八障故說。四爲除顯

語障故說密語。此等或依論文或不依說。攝四意趣唯在第三。以八障故。第三八障以佛法爲次故。佛後說法據四意趣。法是第三卽不依次。阿毗達磨以性相求故。餘準次第配四意趣。

△第五大段明五果分二。初列五果後明五修。

復次方廣分中於法三摩地善巧菩薩相云何可知。

初中初問後答。

謂由五種因故。

答中有三。初總標答次別列答後廣釋答。

一刹那刹那消除一切麤重所依。二出離種種想得。

法苑樂。三了知無量無分別相。大法光明。四順清淨。分無分別相。恆現在前。五能攝受轉上轉勝圓滿成就佛法身因。

善巧菩薩相中由五因故而說五果者。此乃義因。因由之因。非因果因也。其五果如文次第。諸論無諍。

如是五種依諸菩薩三種稱讚功德說。謂奢摩他稱讚功德。毗鉢舍那稱讚功德。此二俱分稱讚功德。奢摩他稱讚功德復有二種。一刹那刹那勝進輕安無有閒缺。徧所依故。刹那刹那消除一切麤重所依。二

勝解諦觀一切教法無有差別同一味故。遠離種種蘊界處等諸義相。想得契經等喜樂法樂。毗鉢舍那稱讚功德亦有二種。一隨所擇法無有間缺不忘失。故由憶念門於無量無分別相契經等法以慧照了。二轉依前所有色像無分別無加行相恆現在前。第五一種是此二俱分稱讚功德。法身者謂所知障永斷轉依所攝。此於第十地名圓滿於如來地名成就。爲令法身速得圓滿成就故。引植轉上轉勝等流習氣故。名攝受彼因。

廣釋答有二。初標依三種稱讚說後各別釋。

如是五種卽顯五修能得五果。何等爲五。謂息相修和合修。無相修。無功用修。轉相修。問。聲聞藏法。菩薩藏法等。從法身所流。何故有情以香鬘等供養菩薩藏法。便生廣大無邊福聚。非聲聞藏法耶。答。以菩薩藏法是一切有情利益安樂所依處。故能建大義。故無上無量大功德聚所生處。故。

言五修而得五果者。大義自如攝大乘論云。一集總修。謂集一切總爲一聚。簡要修習。卽法能生戒。滅不生銷融麤重果。勝進輕安無斷絕。故。二無相修。於離眾相真法界中遣事差別而修習。故。此修。

能生離種種想得法苑樂果。三無功用修離作功用任運轉故。此修能感了知無量大法光明果。顯照行故。四熾盛修。卽是增勝。此修能感順清淨分。無相現行果。能引佛果故。五無喜足修。於下不生足於上多欣後。此但能生法身果。因能生圓滿果法身故。又若此修據實而論。地地皆有。入住出心亦復皆有。以差別論。其初二修入地心作。未入地時。有漏行故。未能集總簡要修習。亦未能生勝進輕安。而不能斷所依麤重。又有諸相。未證真如。於真如法苑中。未能無相。是故入地有此二心。此二

皆是正智觀心。其住地作第三四。未住地時雖正智觀。未緣契經以慧照了。由有功用。又未能引順清淨分。不能增勝。故住地心作此二行。此皆後得皆緣事等所生。於滿地心作第五修。未滿地時但爲前修。於眞法界由未圓淨於地滿心方眞證淨。此卽二智之所並作。地地皆有。入住出心準思類解。又初地至六地修菩提分及波羅蜜多故。皆名集總修。第七地中方名無相。以前之地並有相。故不得名爲有無相修。其此七地雖有無相。由有功用。於第八地說無功用修。於此地中未得四無礙

辯才故。第九地說熾盛修以得辯才熾盛修故。於第十地名無喜足修。法雲降雨常無厭足故。以增勝而論此義。不就實義若實義者。地地皆有。如前可知。

大乘阿毗達磨雜集論述記卷第二十五